



Skattlagning á starfsemi sem fellur undir þriðja geirann

Efni: Tillaga til breytinga á drögum að frumvarpi um breytingu á ýmsum lögum um skatta og gjöld (skattalegur hvatar fyrir lögaðila sem starfa til almannaheilla).

Skýrsla starfshóps um skattlagningu á starfsemi sem fellur undir þriðja geirann var gefin út 29. janúar 2020. Í skýrslunni segir á bls 67-68 undir liðnum "Stuðningur vegna útlagðs byggingarkostnaðar"

Starfshópurinn telur rétt að þeim lögaðilum sem starfa til almannaheilla og hlotið hafa staðfestingu frá Skattinum í kjölfar skráningar á almannaheillafélagaskrá verði veitt heimild til að óska eftir fjárstuðningi úr ríkissjóði af útlögðum kostnaði vegna byggingar, viðhalds eða endurbóta á mannvirki undir starfsemi til almannaheilla upp að ákveðnu hámarki, að uppfylltum ítarlegum skilyrðum.

Til að koma á móts við byggingarkostnað og kostnað vegna viðhalds og endurbóta á mannvirkjum undir starfsemi til almannaheilla leggur starfshópurinn til að lögaðilum í slíkri starfsemi verði veittur réttur á stuðningi í formi endurgreiðslu á hluta útlagðs kostnaðar upp að ákveðnu hámarki, að uppfylltum ítarlegum skilyrðum.

Eingöngu væri um að ræða þá lögaðila sem skráðir væru á almannaheillaskrá hjá Skattinum og væru þannig viðurkenndir sem slíkir. Þá yrði eingöngu um að ræða byggingarkostnað sem fellur ekki til vegna lögbundinna skyldna opinbera aðila, s.s. sveitarfélaga og ríkis og / eða stofnanna þeirra vegna byggingar mannvirkja auk þess sem að opinberar fjárveitingar skyldu að öðru leyti ekki hafa verið veittar vegna byggingar þess mannvirkis sem um ræðir.

Sett yrði sem skilyrði að byggingarkostnaði vegna framkvæmda við mannvirki almannaheillafélags yrði haldið aðgreindum frá öðrum útgjöldum þess og að slíkur stuðningur yrði háður leiðréttingu sem yrði virk er mannvirkið yrði nýtt í öðrum tilgangi en til almannaheilla. Jafnframt yrði gerð krafa um að kostnaðargreining vegna byggingar mannvirkis yrði árituð af endurskoðanda, skoðunarmanni eða viðurkenndum bókara.

Í ljósi þessa gerir Fimleikafélag Hafnarfjarðar það að tillögu sinni að ríkisvaldið verði við tillögum Starfshóps um skattlagningu á starfsemi sem fellur undir þriðja geirann eins og fram kemur hér að ofan.

Til vara leggur Fimleikafélag Hafnarfjarðar til eftirfarandi breytingar:

Í frumvarpi til laga um breytingu á ýmsum lögum um skatta (skattalegir hvatar fyrir lögaðila sem starfa til almannaheilla) er gerð tillaga um breytingu á lögum um virðisaukaskatt nr. 50/1988. Í 8. gr. frumvarpsins er gerð tillaga um nýja málsgrein sem er svohljóðandi: Endurgreiða skal lögaðilum sem hafa með höndum starfsemi sem fellur undir a-f lið 4. tölul. 4. gr laga nr. 90/2003, um tekjuskatt, 60% þess virðisaukaskatts sem þessir aðilar hafa greitt af vinnu manna á byggingastað við byggingu, viðhald eða endurbætur á mannvirkjum sem er í eigu þeirra.

Til þess að ná betur því markmiði að þeir lögaðilar sem starfa til almannaheilla njóti skattalegs hvata/ívilnunar við nýbyggingar leggjum við til að ívilnunin fari í gegn um virðisaukaskattskerfið með þeim hætti að endurgreiddur verði allur virðisaukaskattur sem viðkomandi aðilar hafa greitt og gildir því sama um efni og vinnu og þar af leiðandi verði allur virðisaukaskattur endurgreiddur af heildarbyggingarkostnaði þegar skilyrði hafa verið uppfyllt við lok kostnaðargreiningar en þó ekki fyrr en lokaúttekt hefur farið fram.

Þegar svo nýbyggingu er lokið myndi viðkomandi aðili falla undir 2. mgr. 8. gr. laga um breytingu á lögum um virðisaukaskatt varðandi viðhald og endurbætur á mannvirkinu.



Ný málsgrein 3. mgr bætist við 8. gr. Sem hljóði svo:

Endurgreiða skal lögaðilum sem hafa með höndum starfsemi sem fellur undir a-f-lið 4. tölul. 4. Gr. Laga nr. 90/2003 um tekjuskatt, 100% þess virðisaukaskatts sem þessir aðilar hafa greitt vegna nýbyggingar sem byggð er fyrir eigin kostnað og nýtt er fyrir starfsemi lögaðilans. Skilyrði fyrir þessari endurgreiðslu er að nýbyggingin sé alfarið fjármögnuð og nýtt af þessum aðilum.

Bráðarbirgðarákvæði um að þetta eigi við allar nýbyggingar sem enn eru í byggingu en hafa ekki verið kláraðar með lokaúttekt.

Jafnframt er lagt til breyting sem segir, Endurgreiða skal lögaðilum sem hafa með höndum starfsemi sem fellur undir a-f lið 4. tölul. 4.gr laga nr. 90/2003, um tekjuskatt, 100% þess virðisaukaskatts sem þessir aðilar hafa greitt af efni sem og vinnu manna á byggingastað, viðhald eða endurbætur á mannvirkjum sem er í eigu þeirra.

Ljóst er að þeir lögaðilar sem starfa til almannaheilla verja öllum sínum ávinningi til almennings og því er mikilvægt að ýmsir skattalegir hvatar séu til staðar í innlendra skattalöggjöf sem styrki við og efli þá mikilvægu starfsemi sem þessi félög sinna í íslensku samfélagi. Eins og segir í skýrslunni eru víða í nágrannalöndum okkar víðtækari skattalegir hvatar fyrir þessi félög.

Stærsta fjárfesting slíkra félaga sem starfa til almannaheilla er venjulega mannvirki sem er hjartað í slíkri starfsemi og nægir að nefna t.d. fasteignir sem hýsa tæki og tól björgunarsveita um allt land, íþróttahús sem yngsta fólkið okkar elst upp í þroskast, æfir og leikur sér og fasteignir undir ýmis konar líknandi starfsemi. Ljóst er að ef ekki er vandað til verka getur fjárfesting í nýbyggingu sem nýtt er fyrir félög sem starfa til almannaheilla haft neikvæð áhrif á það göfuga markmið sem þessi félög hafa og dregið þannig úr krafti þeirra til framtíðar litið. Ekki þarf að fjölyrða um að skattalegur hvati vegna nýbyggingar mun hvetja þessa aðila til þess að endurnýja húsnæði sem þeir hefðu annars ekki gert, sem er atvinnuskapandi og auk þess lýðheilsumál að almenningur eigi þess kost að stunda sína starfsemi hvort sem hún er íþróttatengd, eða líknandi í góðum og nýlegum húsakosti.

Hafnarfirði 17. nóvember 2020

f.h. Fimleikafélags Hafnarfjarðar

Viðar Halldórsson, formaður